



Minggu, 11 September 2022

Ogen: 1 Timotius 6:6-10



Cukup Kai Si Lih Ibas Kita



Kegeluh ena kentsik ngenca. Ban kentsikna asa bancina min si ergaken min kegeluh ena alu mehuli. I bas kerina paksa-paksa si man bentasennta, senang, susah, perbeben ras erbage sura-sura si tersehi i bas geluhta. Amin lit ka nge si la ngergaken geluhna alu mehuli apai ka ngenanami ulih latihna. Seh kal medikerna, la saja man kalak sideban man dirina pe, kai pe si idatkena arah pendahinna minter bunikenna.

I bas dampar sideban lit ka nge kalak si la ulih latihna pe atena inanamina. Lebih asa si ngasup ia ncarikenna pe atena man bana, la ia ngasup ngampar sura-surana. E maka man Timotius isehken Paulus pengajaren kerna kebayaken, situjunna mperlengkapi Timotius i bas nehken pengajaren man perpulungen. Arah kai si isehken Paulus perlu nandai diri, ise manusia, ise kita ibabo doni enda. Bagi belas-belas Job i bas Job 1:21a 'kadeku pe la lit asum aku tubuh nai, mate pe aku la pedah lit kadeku pe...' e maka sanga keru kal pe ertana erkiteken bencana si inanamina, erpengendes ia man Dibata. Nggeluh i doni enda enggo jelas keperlunta, uga kita nggeluh alu mehuli, njagai dagingkulata alu pangan ras uisna, lakoken alu mehuli. Terdauhen asa si e jile-jile nari nge ngenca. Sabap adi nggo mbelin kal sura-sura guna bayak banci ndabuh ku percuban, mbelin biak merangap, la erbias-bias, seh maka si kerajangen kalak pe mengga ateta, man banta ateta. Ikataken Paulus maka merangap nandangi duit sumbul kejahatan. Lit contoh sikatakenna paksa e, si merangap ndai lanai nggeluh i bas kiniteken janah ertambah-tambah ukurna gulut, ngukuri erbage silanga idatna.

Kata cukup, bias, la merangap jadi kata kunci arah renungenta paksa enda. Kerina kata enda mabai kita nggeluh alu dem pengarapen nandangi 'pemeliharaan' Tuhan bage pe dem pengataken bujur man baNa si enggo nikapken keperlun geluh. Baginta, dahiken alu tutus, ertanggungjabap, nanami kegeluh ena alu eraru ate, ngendesken diri man Dibata si mpekena-kena geluhta.